

Basel, 23. Dezember 1576

Von Bonaventura Vulcanius

Konzept: UB Leiden, VUL 36, fol. 86r.

Edition: De Vries de Heekelingen S. 220, Nr. 101.

Wolfio.

Quotiescunque Pernam video, non desino monere ut libellis tuis manum admoveat et operam meam illi defero. Ad ille modo se responsum tuum de ordine qui Zwingero magis placet exspectare ait; modo temporis angustiam excusat, excudere enim se Buceri nonnulla quae ad mercatum Francofordiensem absoluta vellet; modo se Osteniis libellos tuos sumptu excudendos daturum ait, atque ita se in omnes colores transmutat Proteus, ut plane nesciam quid tibi certo polliceri possim. Urgebo tamen quantum potero, neque parum gaudebo si quicquam profecero. Arriani exemplar istuc redit, quod tametsi est depravatissimum (ut facile ex variis aliquot lectionibus quas marginibus adjeci colligere poteris) suum tamen habuit usum, sed praecipuum ad locos aliquot male interpunctos castigandum. Pollucem hisce nundinis Argentinensibus exspecto. Faxit Deus ut tale sit exemplar, quale opto, hoc est vetustum et castigatum.

Bene vale. Basileae, 23 Decembris 1576.